

唐
音
統
籤

戊籤餘三十四李中之三 唐音純籤卷七百八

五言排律

新秋有感

門巷涼秋至高梧一葉驚漸添衾簟爽頓覺夢魂
清暗促蓮開艷乍催蟬發聲雨降炎氣滅竹引冷
煙生成客添歸思行人怯遠程未逢征鴈下漸聽
夜砧鳴張翰思鱸興班姬詠扇情音塵兩難問蚤
砌月空明

舟中望九華山

排空蒼翠異巉崿看崔嵬一面兩初歇九峯雲正

開當時思水石便欲上樓臺隱去心難逐吟餘首
懶迴僧休傳紫閣屏歇寫天台中有忘機者逍遙
不可陪

廬山

控壓潯陽景崔嵬古及今勢雄超地表翠盛接天
心溢浦春煙列星灣晚景沉圖經宜細覽題詠卒
難任靖節門遙對庾公樓俯臨參差含積雪隱映
見歸禽峭拔推雙劍清虛數二林白蓮池宛在翠
聲事難尋天近星河冷龍歸洞穴深谷春攢錦繡
石潤疊瓊琳玄鶴傳仙拜青猿伴客吟泉通九江

遠雲出幾州陰冬有靈湯溢夏無炎暑侵他年如
遂隱五老是知音

徐司徒池亭

亭榭跨池塘泓澄入座涼扶疎皆竹栢冷淡似瀟
湘萍嫩鋪波面苔深鎖岸傍朝迴遊不厭僧到賞
難忘最稱收殘雨偏宜帶夕陽吟堪期謝朓醉好
命嵇康奢侈心難及清虛趣最長月明垂釣興何
必憶滄浪

題徐五教池亭

多士池塘好塵中景惡無年來養鷗鷺夢不去江

湖泉脉通深澗風聲起短蘆驚魚跳

一作藻荇戲

蝶上菰蒲泛泛容魚艇閒閒載酒壺漲痕山雨過

翠積岸苔鋪花影沉波底煙光入座隅燒香憐杜
若夜浸愛蟾蜍步逸心難厭看吟興不辜憑君命
竒筆爲我寫成圖

獻喬侍郎

位望誰能並當年志已伸人間傳鳳藻天上演龍
綸賈馬才無敵褒雄譽益臻除姦深繫念致主迫
忘身諫疏縱橫上危言果敢陳忠貞雖貫世消長
豈由人慷慨辭朝闕迢迢涉路塵千山明月照孤

棹渡長津杜宇聲方切江籬色正新卷舒唯合道
喜慍不勞神禪客陪清論漁翁作近鄰靜吟窮野
景狂醉養天真格論思名士輿情渴直臣九霄恩
復降比戶意皆忻却入鴛鴦序終身顧問頻漏殘
丹禁曉日暖玉墀春鑿物心如水憂時鬢若銀惟
期康庶事永要鉉彝倫貴賤知無間孤寒必許親
幾多沉滯者拭目望陶鈞

獻中書潛舍人

運叶半千數天鐘許國臣鵬霄開羽翼鳳闕演絃
綸顧問當清夜從容向紫宸立言成雅誥正意敘

華倫朴素借前哲馨香越搢紳衰辭光萬代優旨
重千鈞公退誰堪接清閒道是隣世間身屬幻物

外意通津弔往兼春夢文高賦復新

舍人有弔往
文春夢賦行

於世也

琴彈三峽水屏畫十洲春庭冷舖苔色池寒

浸月輪竹風來枕簟藥氣上衣巾茶譜傳溪叟棋
經受羽人清虛雖得趣馱替不妨陳杞梓呈才後
神仙入侍頻孤寒皆有賴中外亦同忻有士曾多
難無門得望塵忙忙罹險阻往往耗精神尋果巢
枝願終全負米身連逢敦孝治蹇塞值通津最慶
清朝祿還霜白髮親甘柔心既遂虛薄報何因遠

宦聯綿歷卑棲夙夜勤良時空愛惜末路每悲辛
骨立駒猶病頽彫女尚貧而今偕領遇尺蠖願求
伸

獻中書張舍人

仙桂從攀後人間播大名飛騰諧素志霄漢是前
程持憲威聲振司言品秩清簾開春酒醒月上草
麻成丹陛凌晨對青雲逐步生照人裴玉瑩鑿物
窻陂明下直無他事閒遊恣逸情林僧開戶接溪
叟掃苔迎煮茗山房冷垂綸野艇輕神清宜放曠
詩苦益縱橫餘及時皆仰嘉謀衆佇行四方觀啓

沃畢竟念孤平

獻徐舍人

清名喧四海何止並南金
與學羣英伏多才萬乘
欽秩參金殿峻步歷紫微
深顧問承中旨絲綸演
帝心褒雄饒義路賈馬避
詞林下直無他事開門
對遠岑軒牕來晚吹池沼
歇秋霖鮮點生碁石茶
煙過竹陰希夷元已達
躁競豈能侵羽客閒陪
飲詩人伴靜吟自慙爲
殢物多幸辱虛襟此日
重遭遇心期出陸沉

寄廬山白大師

長憶尋師處東林寓泊時一秋同看月無夜不論
詩泉美茶香異堂深磬韻遲鹿馴眠藓逕猿苦叫
霜枝別後音塵隔年來鬢髮衰趨名方汲汲未果
再遊期

冬日書懷寄惟真太師

自別吾師後風騷道甚孤雪霜侵鬢髮音信隔江
湖擾擾悲時世悠悠役夢途向公期盡節多病怕
傾壺賤跡雖慙滯幽情忍使辜詩成天外句碁覆
夜中圖落壁燈花碎飄牕雪片籠煮茶燒栗興早
晚復圍爐

送孫霽書記赴壽陽辟命

辟命羨君赴其如愴別情酒闌汀樹晚帆展野風
生淮靜寒煙斂村遙夜火明醉沉胸嶺夢吟達壽
春城舊友搖鞭接元戎掃榻迎雪晴蓮幕啓雲散
桂山橫王粲從軍畫陳琳草檄名知君提健筆重
振此嘉聲

雲

悠悠離洞壑冉冉上天津捧日終爲異從龍自有
因高行四海雨暖拂萬山春靜與霞相近閒將鶴
最親帝鄉歸莫問楚殿夢曾頻白向封中起碧從

詩裏新冷容橫釣浦輕縷絲蟾輪不滯濃還淡無
心卷復伸非煙聊擬議千里在逡巡會作五般色
爲祥覆紫宸

秋雨

竟日散如絲吟看半掩扉秋聲在梧葉潤氣逼書
幃曲澗泉承去危簷燕帶歸寒蛩悲旅壁亂蘚滑
漁磯爽欲除幽簟涼須換熟衣疎蓬誰夢斷荒徑
獨遊稀偏稱江湖景不妨鷗鷺飛最憐爲瑞處南
畝稻苗肥

和友人喜雪

唐音統籤

卷七 頁八十一

六

戊

鴈雪頻頻降，成堆不可除。
伴吟花莫並，銷瘴藥何如。
謝女詩成處，夢安睡起初。
深迷樵子徑，冷遍旅人居。
惹砌催罇俎，飄牕入簿書。
最宜樓上望，散亂滿空虛。

庭葦

品格清於竹，詩家景最幽。
從栽向池沼，長似在汀洲。
玩好招溪叟，棲堪待野鷗。
影疎當夕照，花亂正深秋。
韻細堪清耳，根牢好繫舟。
故溪高岸上，冷淡有誰遊。

六言律詩

對酒招陳昭用

花開葉落堪悲似，水年光暗移。身世都如夢，役是非空使。神疲良圖有分，縱在所欲無勞。妄思幸有一壺清酒，且來閒話希夷。

贈東林白大師

虎溪久駐靈蹤，禪外詩魔尚濃。卷宿吟銷，永日移牀坐對，千峯蒼蒼冷鑠。幽徑微風，間生古松。自說年來老病，出門漸覺疎慵。

寄楊先生

仙翁別後無信，應共烘霞卜隣。莫把壺中秘訣，輕

唐詩新編
傳塵裏遊人浮生日月自急上境鶯花正春安得
一招琴酒與君共泛天津

落花

殘紅引動詩魔懷古牽情奈何半落銅臺月曉亂
飄金谷風多悠悠旋逐流水片片輕粘短莎誰見
長門深鎖黃昏細雨相和

戊籤餘三十四李中之四 唐音統籤卷七百八

七言律詩一

江邊吟

風暖汀洲吟興生
遠山如畫雨新晴
殘陽影裏水東注
芳草煙中人獨行
閃閃酒帘招醉客
深深綠樹隱啼鶯
盤桓漁舍忘歸去
雲靜高空月又明

海上從事秋日書懷

悠悠旅宦役塵埃
舊業那堪信未迴
千里夢隨殘月斷
一聲蟬送早秋來
壺傾濁酒終難醉
匣鎖青萍久不開
唯有搜吟遺懷抱
涼風時復上高臺

晚春客次偶吟

暫駐征輪野店間
悠悠時節又春殘
落花風急宿醒解
芳草雨昏春夢寒
慙逐利名頭易白
欲眠雲水志猶難
却憐村寺僧相引
閒上虛樓共倚欄

下蔡春偶作

旅館飄飄類斷蓬
悠悠心緒有誰同
一宵風雨花飛後
萬里鄉關夢自通
多難不堪容鬢改
沃愁惟怕酒杯空
採蘭扇枕何時遂
洗慮焚香叩上穹

下蔡春暮旅懷

柳過春霖絮亂飛
旅中懷抱獨栖栖
月生灘上雲

初散家在江南夢去迷髮白每慙清鑑啓心孤畏
怯子規啼拜恩一作章爲養慈親急願向明朝捧紫
泥

思湓渚舊居

昔歲曾居湓水頭草堂吟嘯興何幽迎僧常踏竹
間蘚愛月獨登溪上樓寒翠入簷嵐岫曉冷聲縈
枕野泉秋從居官路無由到昨夜分明夢去遊

思九江舊居三首

結茅曾在碧江隈多病貧身養拙來雨歇汀洲垂
釣去月當門巷訪僧迴靜臨牕下開琴匣悶向牀

頭潑酒醅遊宦等閒千里隔空餘魂夢到漁臺
門前煙水似瀟湘放曠優游興味長虛閣靜眠聽
遠浪扁舟閒上泛殘陽鶴翹碧蘚庭除冷竹引清
風枕簟涼犬吠疎籬明月上鄰翁攜酒到茅堂
無機終日狎沙鷗得意高吟景且幽檻底江流偏
稱月簷前山朶最宜秋遙村處處吹橫笛曲岸家
家繫小舟別後再遊心未遂設屏惟畫白蘋洲

秋日登潤州城樓

虛樓一望極封疆積雨晴來野景長水接海門鋪
遠色稻連京口發天香鳴蟬歷歷空相續歸鳥翩

翻自著行吟罷倚欄深
有思清風留我到斜陽

登毗陵青山樓

高樓閒上對晴空
豁目開襟半日中
千里吳山青不斷
一邊遼海浸無窮
人生歌笑開花霧
世界興亡落葉風
吟罷倚欄何限意
回頭城郭暮煙籠

宿臨江驛

候館寥寥輟棹過
酒醒無奈旅愁何
兩昏郊郭行人少
葦暗汀洲宿馬多
干祿已悲彫髮鬢
結茅終愧負烟蘿
篇章早晚逢知己
苦志忘形自有魔

甲子歲罷吉水縣過鍾陵時暮春維舟江渚

謁柴太尉席上作

公僕延駐暫踟躕况值風光三月初
亂落杯盤花片小靜籠池閣柳陰疎
舟維南浦程雖阻飲預西園興有餘
却笑田家門下客當時容易歎車魚

吉水春暮訪蔡文慶處士畱題

無事無憂鬢任蒼濁醪閒酌送韶光
溟濛雨過池塘暖狼藉花飛硯席香
好古未嘗疎典冊懸圖時要看瀟湘
戀君清話難畱處歸路迢迢又夕陽

維舟秋浦逢故人張炬同泊

卸帆清夜碧江濱冉冉涼風動白蘋
波上正吟新

霽月岸頭恰見故鄉人共驚別後霜侵鬢互說年來疾逼身且飲一壺銷百恨會須遭遇識通津

書郭判官幽齋壁

不妨公退尚清虛
初得幽齋興有餘
要引好風清戶牖
旋栽新竹滿庭除
傾壺待客花開後
煮茗留僧月上初
更有野情堪愛處
石牀苔蘚似匡廬

留題胡參卿秀才幽居

竹蔭庭除蘚色濃
道心安逸寂寥中
扣門時有栖禪客
灑一作灑洒一作灑酒多招探藥翁
江近好聽菱芡雨
徑

香偏愛蕙蘭風
我慙名宦猶拘束
脫屣心情未得

同

春晚過明氏閒居

寥寥陋巷獨扃門，白樂清虛不厭貧。
數局碁中消永日，一罇酒裏逆殘春。
雨催綠蘚鋪三徑，風送飛花入四鄰。
羨爾朗吟無外事，滄洲何必去垂綸。

江次維舟登古寺

輟棹因過古梵宮，荒涼門徑鏤苔茸。
綠陰滿地前朝樹，清韻含風後殿鐘。
童子縱慵眠壞榻，老僧耽話指諸峯。
吟餘却返來時路，迴首盤桓尚駐節。

題廬山東寺遠大師影堂

遠公遺跡在東林往事名存動苦吟杉檜已依靈
塔老煙霞空鎖影堂深入簾輕吹催香印落石幽
泉雜磬音十八賢人消息斷蓮池千載月沉沉

遊北山洞神宮

悶見塵中光景促仙鄉來禮紫陽君人居淡寂應
難老道在虛無不可聞松檜穩栖三鳥鶴樓臺閒
鏡九霄雲羨師心此朝星斗一炷清香午夜焚

經古觀有感

古觀寥寥枕碧溪偶思前事立殘暉漆園化蝶名
空在柱史猶龍去不歸丹井泉枯苔鎖合醮壇松

折鶴來稀回頭因歎浮生事夢裏光陰疾若飛

宿廬山白雲峯重道者院

絕頂松堂喜暫遊一宵玄論接浮丘雲開碧落星
河近月出滄溟世界秋塵裏年光何急急夢中強
弱自悠悠他時書劍酬恩了願逐鸞車看十洲

獻張義方常侍

雄飛看是逼崑廊逸思常聞不暫忘公署靜眠思
水石古屏開展看瀟湘老來酒病雖然減秋杪詩
魔更是狂乘興有時招羽客橫琴移月啓茅堂

獻中書湯舍人

慶雲呈瑞爲明時
演暢絲綸在紫微
舉殿對時親舜日
鯉庭過處著萊衣
閒尋竹寺聽啼鳥
吟倚江樓戀落暉
隔座銀屏看是設
一門清貴古今稀

獻張拾遺

官資清貴近丹墀
性格孤高世所稀
金殿日聞親鳳宸
古屏時展看漁磯
酒醒虛閣秋簾捲
吟對疎篁夕鳥歸
獻替頻陳忠譽播
鵬霄萬里展雄飛

投所知

孤琴塵翳劒慵磨
自願泥蟠欲奈何
千里交親消息斷
一庭風雨夢魂多
題橋未展相如志
叩角誰

憐甯戚歌唯賴明公憐道在敢攜篋笠釣煙波

海上和郎戩員外赴倅職

宋玉逢秋何起悲新恩委寄好開眉班昇鴛鷺頻
經歲任佐藁黃必暫時乍對煙霞吟海嶠應思蘋
蓼夢江湄一朝鳳詔重徵入鵬化那教尺鷃知

新喻縣酬王仲華少府見貽

事簡開樽有逸情共忻官舍月華清每慙花欠河
陽景長愧琴無單父聲未泰黎元慚曠職縱行謙
直是虛名與君盡力行公道敢向昌朝俟陟明

海上和柴軍使清明書事

清明時節好煙光
英傑高吟興味長
捧日卽應還禁衛
當春何惜醉胸陽
千山過雨難藏翠
百卉臨風不藉香
却是旅人恹屑甚
夜來魂夢到家鄉

和胸陽載筆魯裕見寄

燕臺多事每開顏
相許論交淡薄間
飲興共憐芳草岸
吟情同愛夕陽山
露濃小逕蛩聲咽
月冷空庭竹影閒
何事此時琴憶甚
與君俱是別鄉關

和夏侯秀才春日見寄

綿蠻黃鳥不堪聽
觸日離愁怕酒醒
雲散碧山當晚檻
雨催青蘚匝春庭
尋芳懶向桃花塢
垂釣空

思杜若汀晝夢不成吟有興揮毫書在枕邊屏

晉陵罷任寓居依韻和陳銳秀才見寄

掩門三逕莓苔綠車馬誰來陋巷間臥棄琴書公
幹病笑迎風月步兵閒當秋每謝葢清耳漸老多
慙酒借顏濟物未能伸一術敢於明代愛青山

吉水縣依韻酬華松秀才見寄

官况蕭條在水村吏歸無事好論文枕欹獨聽殘
春雨夢去空尋五老雲竹筵每憐和蘚步禽聲偏
愛隔花聞詩情冷淡知音少獨喜江臯得見君

贈海上書記張濟員外

鵬霄休歎志難伸，貧病雖縈道且存。
阮瑀不能專筆硯，嵇康唯要樂琴樽。
春風滿院空歌枕，芳草侵階獨閉門。
劔有塵埃書有蠹，昔年心事共誰論。

贈胸山孫明府

縣庭無事似山齋，滿砌青青旋長苔。
閒撫素琴曹吏散，自烹新茗海僧來。
買將病鶴勞心養，移得閒花用意栽。
幾度訪君留我醉，甕香皆值酒新開。

贈永真杜翱少府

藍袍竹簡佐琴堂，縣僻人稀覺日長。
愛靜不嫌官况冷，苦吟從聽鬢毛蒼。
閒尋野寺聽秋水，寄睡僧

唐書新集
贈到夕陽騫翥會應霄漢去漁竿休更戀滄浪

贈夏秀才

軒車紫陌競尋春獨掩衡門病起身步月怕傷三
徑蘚取琴因拂一牀塵明時儻有丹枝分青鑑從
他素髮新况是青雲知已在原思生計莫憂貧

贈蒯亮處士

著得新書義更幽負琴何處不遊遊玄宮寄宿月
華冷羽客伴吟松韻秋滿戶煙霞思紫閣一帆風
雨憶滄洲吾君側席求賢切未可懸瓢枕碧流

贈史虛白

致主嘉謀尚未伸慨然深志與誰論喚迴古意琴
開匣陶出真情酒滿樽明月過溪吟釣艇落花堆
蓆睡僧軒九重夢卜時終在莫向深雲獨閉門

贈上都先業大師

懶向人前著紫衣虛堂閒倚一條藜雖承雨露居
龍關終憶煙霞夢虎溪睡起曉牕風浙浙病來深
院草萋萋有時乘興尋師去煮茗同吟到日西

贈謙明上人

雖寄上都眠竹寺逸情終憶白雲端閒登鍾阜林
泉晚夢去沃洲風雨寒新試茶經煎有興舊嬰詩

病捨終難常聞秋夕多無寐月在高臺獨凭欄

贈鍾尊師遊茅山

筇杖擔琴背俗塵路尋茅嶺有誰羣仙翁物外應
相遇靈藥壺中必許分香入肌膚花洞酒冷侵魂
夢石牀雲伊予亦有朝修志異日遨遊願見君

贈重安寂道者

寒松肌骨鶴心情混俗陶陶隱姓名白髮只聞悲
短景紅塵誰解信長生壺中日月存心近島外煙
霞入夢清每許相親應計分琴餘常見話蓬瀛

貽廬山清溪觀天尊師

霞帔星冠復杖藜積年修鍊住靈溪松軒睡覺冷
雲起石磴坐來春日西採藥每尋巖逶遠彈琴常
到月輪低鼎中龍虎功成後海上三山去不迷

贈王道友

俗從教鬢似銀世人無分得相親槎流海上波
濤潤酒滿壺中天地春功就不看丹竈火性閒時
拂玉琴塵仙家變化誰能測只恐洪崖是此身

卷終

戊籤餘三十四李中之五 唐音統籤卷七十三

七言律詩二

暮春有感寄宋維員外

杜宇聲中老病心
此心無計駐光陰
西園雨過好
花盡南陌人稀
芳草深喧夢却嫌鶯語
老伴吟惟怕月輪沉
明年才候東風至
結駟期君預去尋

安福縣秋吟寄陳銳秘書

縣庭事簡得餘功
詩興秋來不可窮
臥聽寒蛩莎砌月
行衝落葉水村風
愁髭漸去人前白
醉面猶憐鑑裏紅
苦恨交親多契濶
未知良會幾時同

秋江夜泊寄劉鈞正字

閒憶詩人思倍勞
維舟清夜泥風騷
魚龍不動澄江遠
雲霧皆收皎月高
潮滿釣舟迷浦嶼
霜繁野樹叫猿猱
此時吟苦君知否
雙鬢從他有二毛

壬申歲承命之任淦陽再過廬山國學感舊
寄劉鈞明府

三十年前共苦辛
囊螢曾寄此煙岑
讀書燈暗嫌雲重
搜句石平憐蘚深
各歷官途悲聚散
幾看時輩或浮沉
再來物景還依舊
風冷松高猿狖吟

懷廬岳舊遊寄劉鈞感鑒上人

昔年廬岳閒遊日乘興因尋物外僧寄宿愛聽松
葉雨論詩惟對竹牕燈各拘片祿尋分別高謝浮
名竟未能一念支公安可見影堂何處暮雲凝

秋江夜泊寄劉鈞

萬里江山斂暮煙旅情當此獨悠然沙汀月冷帆
初卸葦岸風多人未眠已聽漁翁歌別浦更堪邊
鴈過遙天與君共俟翻身了結侶波中寄釣船

對雨寄胸山林番明府

竟日如絲不暫停莎堵閒聽滴秋聲斜飄虛閣琴
書潤冷逼幽牕夢寐清開戶只添搜句味看山還

阻上樓情遙知公退琴堂靜坐對蕭騷飲興生

秋夜吟寄左偃

與君詩興素來狂况入清秋夜景長溪閣共誰看
好月莎堦應獨聽寒蠶卷中新句誠堪喜身外浮
名不足忙會約垂名繼前哲任他玄髮盡如霜

海上春夕旅懷寄左偃

柳過清明絮亂飛感時懷舊思悽悽月生樓閣雲
初散家在汀洲夢去迷髮白每慙清鑑啓酒醒長
怯子規啼北山高臥風騷客安得同吟復杖藜

寄左偃

蕭條陋巷綠苔侵何事君心似我心貧戶懶開元
愛靜病身纔起便思吟閒畱好鳥庭柯密暗養鳴
蛩砌草深况是清朝重文物無愁當路少知音

懷舊夜吟寄趙杞

長笛聲中海月飛桃花零落滿庭輝魂銷事去無
尋處酒醒孤吟不寐時萱草豈能忘積恨尺書誰
與達相思悠悠方寸何因解明日江樓望渺瀰

暮春吟懷寄姚端先輩

無奈詩魔旦夕生更堪芳草滿長汀故人還爽花
前約新月又生江上亭莊夢斷時燈欲盡蜀魂啼

處酒初醒何時得見登龍客隔却千山萬仞青

暮春懷故人

池館寂寥三月盡落花重疊葢莓苔惜春春戀不
忍掃感物心情無計開夢斷美人沉信息目穿長
路倚樓臺琅玕繡段安何得流水浮雲共不迴

海城秋夕寄懷舍弟

鳥栖庭樹夜悠悠枕上誰知淚暗流千里夢魂迷
舊業一城砧杵搗殘秋牕間寂寂燈猶在簾外蕭
蕭雨未休早晚萊衣同看去免悲流落在邊州

思簡寂觀舊遊寄重道者

閒憶當年遊物外羽人曾許駐仙鄉溪頭烘藥煙
霞暖花下圍碁日月長偷摘蟠桃思曼倩化成蝴
蝶學蒙莊俗緣未斷歸浮世空望林泉意欲狂

寄廬山簡寂觀重道者

憶昔採芝廬岳頂清宮常接絳霄人玉書閒展石
樓曉瑤瑟醉彈琪樹春惟恨仙桃遲結實不憂滄
海易成塵似醒一夢歸凡世空向彤霞寄夢頻

再遊洞神宮懷邵羽人有感

重向煙蘿省舊遊因尋遺跡想浮丘峯頭鶴去三
清遠壇畔月明千古秋泉落小池清復咽雲從高

嶠起還收自慙未得冲虛術白髮無情漸滿頭

送郎員外赴闕

心似白雲歸帝鄉暫停良晝別龔黃煙波乍曉浮
蘭棹魂夢先飛近御香一路伴吟汀草綠幾程清
思水風涼想應數對忠言後不放卿雲離太陽

送致仕沈彬郎中遊茅山

掛却朝冠披鶴氅羽人相伴恣遨遊忽因風月思
茅嶺便挈琴樽上葉舟野寺宿時魂夢冷海門吟
處水雲秋華陽洞府年光永莫向仙鄉擬駐留

送胸山孫明府赴壽陽幕府辟命

堪羨元戎虛右席便承綸綍起金臺菊叢叢憔悴陶
潛去蓮幕光輝阮瑀來好向樽罍陳妙畫定應書
檄播雄才預愁別後相思處月入閒牕遠夢迴

送相里秀才之匡山國子監

氣秀情閒杳莫群廬山遊去志求文已能探虎窟
騷雅又欲囊螢就典墳目豁乍窺千里浪夢寒初
宿五峯雲業成早赴春闈約要使嘉名海內聞

送姚端秀才遊毘陵

毘陵嘉景太湖邊才子經遊稱少年風弄青帘沽
酒市月明紅袖採蓮船若邪菴畫應相似

若邪溪
名在毘

陵
越岫吳峯盡接連此去高吟須早返廣寒丹桂
莫遷延

送夏侯秀才

江村搖落暮蟬鳴執手臨岐動別情古岸相看殘
照在片帆難駐好風生牽吟一路逢山色醒睡長
汀對月明况是清朝至公在預知喬木定遷鶯

送圓上人歸廬山

蓮宮舊隱塵埃外策杖臨風拂袖還踏雪獨尋青
嶂下聽猿重入白雲間蕭騷紅樹當門老斑駁蒼
苔鎖徑閒預想松軒夜禪處虎溪圓月照空山

送廬阜僧歸山陽

山陽舊社終經夢容易言歸不可畱
瓶貯瀑泉離五老錫搖江雨上孤舟
魚行細浪分沙背鴈逆高風下葦洲
遙想枚臯宅邊寺不知涼月共誰遊

代別

明日鳴鞭天一涯悠悠此夕怯分離
紅樓有恨金波轉翠黛無言玉筯垂
浮蟻不能迷遠意迴紋從此寄相思
花時定是慵開鑑獨向春風忍掃眉

哭故主人陳太師

十年孤跡寄侯門入室升堂忝厚恩
遊遍春郊隨

苦柿飲殘秋月待金樽車魚鄭重知難報吐握周
旋不可論長慟徘徊逝川止白楊蕭颯又黃昏

哭柴郎中

昔歲遭逢在海城曾容孤跡奉雙旌酒邊不厭笙
歌盛花下只愁風雨生棋接山亭松影晚吟陪月
檻露華清音塵自此無因問淚灑川波夕照明

悼懷王喪妃

花綻花開事可驚暫來浮世返蓬瀛楚宮夢斷雲
空在洛浦神歸月自明香解返魂成浪語膠能續
斷是虛名音容寂寞春牢落誰會樓中獨立情

石棋局獻時宰

得從岳叟誠堪重，却獻臯夔事更宜。
公退啓枰書院靜，日斜收子竹陰移。
適情豈待樵柯爛，罷局還應屐齒墮。
預想幽牕風雨夜，一燈閒照覆圖時。

題吉水縣廳前新栽小松

斷開幽澗蘚苔斑，移得孤根植砌前。
影小未遮官舍月，翠濃猶帶舊山煙。
羣花解笑香寧久，衆木雖高節不堅。
輸我婆娑欄檻內，晚風蕭颯學幽泉。

竹

森森移得自山莊，植向空庭野興長。
便有好風來

長言集卷之二
枕簟更無閒夢到瀟湘
塵來砌蘚經疎雨引下溪
金帶夕陽閒約羽人同賞處
安排碁局就清涼

桃花

祇應紅杏是知音
灼灼偏宜間竹陰
幾樹半開金谷曉
一谿齊綻武陵深
艷舒百葉時皆重
子熟千
年事莫尋誰步
宋墻明月下好香和影上衣襟

柴司徒牡丹

暮春欄檻有佳期
公子開顏乍拆時
翠幄密籠鶯未識
好香難掩蝶先知
願陪妓女爭調樂
欲賞賓朋預課詩
只恐却隨雲雨去
隔年還是動相思

鶴

九臯羽翼下晴空萬里心難駐玉籠清露滴時翹
蘼徑白雲開處唳松風歸當華表千年後怨在瑤
琴別操中好共靈龜作儔侶十洲三島逐仙翁

七言排律

海上太守新翔東亭

使君心智杳難同選勝開亭景莫窮高敞軒牕迎
海月預栽花木待春風靜披典籍堪師古醉擁笙
歌不礙公滯徑苔紋疎雨後入簷山色夕陽中偏
宜下榻延徐孺最稱登門禮孔融事簡豈妨頻賞

翫況當爲政有餘功

五言絕句

遊茅山二首

綠蘚深迎步紅霞爛滿衣
洞天應不遠鸞鶴向人飛

茅許仙蹤在煙霞一境清
夷希何許叩松逕月空明

再到山陽尋故人不遇二首

維舟登野岸因訪故人居
亂後知何處荆榛匝弊廬

欲問當年事，耕人都不知。
空餘堤上柳，依舊自垂絲。

感事呈所知

競愛松筠翠，皆憐桃李芳。
如求濟世廣，桑柘願商量。

貽青陽宰

徵賦常登限，名山管最多。
吏閒民訟少，特得訪煙蘿。

劍客

恩讐期必報，豈是輒輕生。
神劍冲霄去，誰爲不平。

平

早春

一種和風至千花未放妍
草心并柳眼長是被恩先

春雲

陰去爲膏澤晴來媚曉空
無心亦無滯舒卷在東風

梅花

群木方憎雪開花長在先
流鶯與舞蝶不見許因緣

途中柳

翠色晴來近長亭路去遙無人折煙縷落日拂溪橋

柳絮

年年二月暮散亂雜飛花雨過微風起狂飄千萬家

隔牆花

顏色尤難近馨香不易通朱門金鎖隔空使怨春風

鶴

警露精神異冲天羽翼新千年一歸日誰識令威
身

六言絕句

客中春思

又聽黃鳥綿蠻目斷家鄉未還春水引將客夢悠
悠繞徧關山

鶯

羽毛特異諸禽出谷堪聽好音薄暮欲棲何處雨
昏楊柳深深

燕

豪家五色泥香銜得管巢太忙喧覺佳人畫夢雙
雙猶在雕梁

奉終

戊籤餘三十四李中之六 唐音統籤卷

七百八十四

七言絕句

宮詞二首

門鎖簾垂月影斜
翠華咫尺隔天涯
香鋪羅幌不成夢
背壁銀缸落盡花

金波寒透水精簾
燒盡沉檀手自添
風遞笙歌門已掩
翠華何處夜厭厭

春閨辭二首

塵昏菱鑑懶修容
雙臉桃花落盡紅
玉塞夢歸殘燭在
曉鶯牕外嘯梧桐

邊無音信暗消魂
茜袖香裙積淚痕
海蕪歸來門
半掩悠悠花落又黃昏

採蓮女

晚涼含笑上蘭舟
波底紅粧影欲浮
陌上少年休
植足荷香深處不迴頭

感興

漁休渭水興周日
龍起南陽相蜀時
不遇文王與
先主經天才業擬何爲

春日書懷

千峯雪盡鳥聲春日永
孤吟野水濱
霄漢路岐昇

未得花時空拂滿衣塵

鍾陵春思

沉沉樓影月當午
冉冉風香花正開
芳草迢迢滿南陌
王孫何處不歸來

春曉

殘燭猶存月尚明
幾家幃幌夢魂驚
星河漸沒行人動
歷歷林梢百舌聲

春夕偶作

早是春愁觸目生
那堪春夕酒初醒
貫珠聲罷人歸去
半落桃花月在庭

秋夕書懷

功名未立誠非晚，骨肉分飛又入秋。
枕上不堪殘夢斷，壁蛩牕月夜悠悠。

感秋書事

官途憔悴雪生頭，家計相牽未得休。
紅蓼白蘋消息斷，舊溪煙月負漁舟。

七夕

星河耿耿正新秋，絲竹千家列綵樓。
可惜穿針方有興，纖纖初月苦難留。

夕陽

影未沉山水面紅遙天雨過促征鴻魂銷舉子不
回首閒照槐花驛路中

捧宣頭許歸侍養

泥書捧處聖恩新許覲庭闈養二親螻蟻至微寧
足數未知何處蒼穹旻

村行

極目青青穰麥齊野塘波濶下鳧鷖陽鳥景暖林
桑密獨立閒聽戴勝啼

溪邊吟

鷓鴣雙飛下碧流蓼花蘋蕙正含秋茜裙二八採

蓮去笑衝微雨上蘭舟

憶溪居

竹軒臨水靜無塵別後鳧鷖入夢頻
杜若菰蒲煙雨歇一溪春色屬何人

酒醒

睡覺花陰芳草軟不知明月出墻東
杯盤狼籍人何處聚散空驚似夢中

所思

解珮當明在洛濱悠悠疑是夢中身
自從物外無消息花謝鶯啼近十春

敘吟二首

往哲搜羅妙入神，隋珠和璧未爲珍。而今所得慙難繼，謬向平生著苦辛。

成僻成魔二雅中，每逢知己是亨通。言之無皐終難厭，欲把風騷繼古風。

春日招宋維先輩

甕中竹葉今朝熟，鑑裏桃花昨日開。爲報廣寒攀桂客，莫辭相訪共銜杯。

訪廬山歸章禪伯

沉沉石室疎鐘後，寂寂莎池片月明。多少學徒求

妙法要於言下悟無生

訪章禪老

比尋禪客叩禪機
澄却心如月在池
松下偶然醒一夢
却成無語問吾師

訪洞神宮邵道者不遇

閒來仙觀問希夷
雲滿星壇水滿池
羽客不知何處去
洞前花落立多時

雲滿一作雲歸

登下蔡縣樓

長涯煙水又含秋
吏散時時獨上樓
信斷蘭臺鄉國遠
依稀王粲在荊州

宿韋校書幽居

溪上高眠與鶴閒
樽留我待柴關
園林月白秋霖歇
一夜泉聲似故山

書夏秀才幽居壁

永巷苔深戶半開
牀頭書劍積塵埃
最憐小檻疎篁晚
幽鳥雙雙何處來

夏日書依上人壁

門外塵飛暑氣濃
院中蕭索似山中最
憐煮茗相留處
疎竹當軒一榻風

廬山栖隱洞譚先生院留題

壇畔歸雲冷溼襟拂苔移石坐花陰偶然醒得莊
周夢始覺玄門興味深

離家

送別人歸春日斜獨鞭羸馬指天涯月生江上鄉
心動投宿匆忙近酒家

途中作

逢舊識聞老親
所患不至加甚

煙波涉歷指家林欲到家林懼却深得信慈親痾
瘵減當時寬勉採蘭心

秋日途中

信步騰騰野岸邊離家都爲利名牽疎林一路斜

陽裏颯颯西風滿耳蟬

夜泊江渚

水鄉明月上晴空汀島香生杜若風不是當年獨
醒客且沽村酒待漁翁

泊秋浦

葦岸風高宿鴈驚維舟特地起鄉情漁兒隔水吹
橫笛半夜空江月正明

江行值暴風雨

風狂雨暗舟人懼自委神明志不邪投得葦灣波
浪息岸頭煙火近人家

旅次聞砧

砧杵誰家夜搗衣
金風淅淅露微微
月中獨坐不成寐
舊業經年未得歸

和潯陽宰感舊絕句五首

追感古今情不已
竹軒閒取史書看
欲親往哲無因見
空樹臨風襟袖寒

潯陽物景真難及
練瀉澄江最好看
曾上虛樓吟倚檻
五峯擎雪照人寒

園林春媚千花發
爛熳如將畫障看
惟愛松筠多冷淡
青青偏稱雪霜寒

知君百里鳴琴處，退千山盡日看政化有同風。
偃草更將餘力拯孤寒。

昔歲尋芳忻得侶，江堤物景盡情看。就中吟戀垂
楊下，撼起啼鶯晚吹寒。

吉水縣酬夏侯秀才見寄

啓鑑悠悠兩鬢蒼，病來心緒易淒涼。知音不到吟
還懶，鎖印開簾又夕陽。

贈念法華經綬上人

五更初起掃松堂，瞑日先焚一炷香。念徹蓮經誰
得見，千峯巖外曉蒼蒼。

思胸陽春遊感舊寄柴司徒五首

王孫昔日甚相親，共賞西園正媚春。
醉臥如茵芳草上，覺來花月影籠身。

輝鋪芳草正綿綿，藉草傳杯似列仙。
暫輟笙歌且聯句，含毫花下破香殘。

南陌風和舞蝶狂，惜春公子戀斜陽。
高歌飲罷將迴轡，衣上花兼百草香。

春郊飲散暮煙收，却引絲簧上翠樓。
紅袖歌長金犢亂，銀蟾飛出海東頭。

昔年常接五陵狂，洪飲花間數十場。
別後或驚如

夢覺音塵難問水茫茫

杪秋夕吟懷寄宋維先輩

江島窮秋木葉稀月高何處搗寒衣苦嗟不見登
龍客此夜悠悠一夢飛

鍾陵禁煙寄從弟

落絮飛花日又西踏青無侶草萋萋交親書斷竟
不到忍聽黃昏杜宇啼

所思代人

巫峽雲深湘水遙更無消息夢空勞夢迴深夜不
成寐起立閒庭花月高

送遷客

危言危行是男兒倚伏相牽豈足悲
莫向汀洲時獨立悠悠斜日照江離

送劉恭遊廬山兼寄令上人

松桂煙霞蔽梵宮詩流閒去訪支公
石堂磬斷相逢夜五老月生谿影空

送虞道士

煙霞聚散通三島星斗分明在一壺
笑說餘杭酒去蔡家重要會麻姑

贈別

行杯酌罷歌聲歇不覺前汀月又生自是離人魂
易斷落花芳草本無情

漁父二首

偶向蘆花深處行溪光山色晚來晴漁家開戶相
迎接稚子爭窺犬吠聲

雪鬢衰髯白布袍笑攜鱸鮓換村醪慙慙畱我宿
溪上釣艇歸來明月高

吹笛兒

隴頭休聽月明中妙竹嘉音際會逢見爾樽前吹
一曲令人重憶許雲封

雲封開元
善笛者

經廡宅

一夢齊華去不還
斷墻花發豈堪看
玉纖素纒知何處
金井梧枯碧甃寒

夏雲

如峯形狀在
西郊未見從
龍上
次寥多謝好風吹
起後化爲甘雨濟田苗

柳二首

春來無樹不青青
似共東風別有情
閒憶舊居滄水畔
數枝煙雨屬啼鶯

最愛青青水國中
莫愁門外間花紅
纖纖無力勝

春色撼起啼鶯恨晚風

紅花

紅花顏色掩千花任是猩猩血未加染出輕羅莫
相貴古人崇儉誠奢華

對竹

懶穿幽徑衝鳴鳥忍踏清陰損翠苔不似閒閒歌
枕聽秋聲如雨入軒來

春苔

春霖催得鎖煙濃竹院莎齋逕小通誰愛落花風
味處莫愁門巷襯殘紅

子規

暮春滴血一聲聲
花落年年不忍聽
帶月莫啼江畔樹
酒醒遊子在離亭

放鷺鷥

池塘多謝久淹留
長得霜翎放自由
好去蒹葭深處宿
月明應認舊江秋

蛩

月冷莎庭夜已深
百蟲聲外有清音
詩情正苦無眠處
愧爾堵前相伴吟

句

螢影夜燃疑曉起
茶煙朝出認雲歸

柴司徒亭前
假山本集序

卷終

戊籤餘三十五

唐音統籤卷

七百八十五

韋莊字端已杜陵人見素之孫疎曠不拘小節乾
寧元年第進士授校書郎轉補闕王建開蜀昭宗
遣李珣宣慰兩川辟莊判官行莊以中原多故欲
依建建辟之掌書記尋以起居舍人召建表留以

莊名臣世族恩禮殊厚卽僞位拜散騎常侍進吏

部侍郎平章事卒僞謚文靖詩五卷

莊浣花集弟
藹編錄序略

云家兄自庚子亂離前比著歌詩文章數十通屬
兵火迭興簡編俱墜惟餘口誦者所存者幾爾後
流離漂泛寓日緣情迄于癸亥歲又綴僅千餘首
辛酉春應聘爲蜀奏記明年浣花溪尋得杜工部
舊址結茅爲室思其人欲成其處藹因錄兄業成
默誦者次爲十卷日之曰浣花集亦杜陵所居之
詩子元箋

義也後所製用繼于右時癸亥六月九日一按
史莊全集二十卷晁公武讀書志稱僅存五卷今
行世十卷入蜀後詩槩無之亦非全本也集以年
爲次今編分體仍注其年于下集所不載者搜得
七十首附各體末注補遺二字別之又詩餘四
七首別見辛籤二紀事云莊應舉時遇巢寇犯關
著秦婦吟云內庫燒爲錦繡灰天街踏盡公卿骨
在位多垂訝莊乃諱之時號秦婦吟秀才嘗作感
懷詩有大盜不將爐冶去有心重築太平基之句
人謂其包括生成果爲台輔後晚年忽詠句云誰
知閒臥意非病亦非眠及手從雕扇落頭任漉巾
編識者推其不祥復吟子美詩白沙翠竹江村暮
相送柴門月色新不輟是歲
果卒花林坊葬于白沙云

五言古詩

信州西三十里山名仙人城下有月巖山其
狀秀拔中有山門如滿月之狀余因行役過

其下聊賦是詩

自三衢至江西作

驅車過閩越路出饒陽西
仙山翠如畫簇簇生虹蜺
羣峰若侍從衆阜如嬰提
巖巒互吞吐嶺岫相追攜
中有月輪滿皎潔如圓珪
玉皇恣遊覽到此神應迷
嫦娥曳霞帔引我同攀躋
騰騰上天半玉鏡懸飛梯
瑤池何悄悄鸞鶴煙中棲
回頭望塵世露下寒淒淒

少年行

以下補遺

五陵豪客多買酒黃金
觥醉下酒家樓美人雙翠
纔揮劍邯鄲市走馬梁王
苑樂事殊未央年華已

云晚

閨月

明月照前除
煙華蕙蘭濕
清風行處來
白露寒蟬
急美人情易傷
暗上紅樓立
欲言無處言
但向姮娥泣

閨怨

戚戚被何人
明眸利子月
啼粧曉不乾
素面凝香
雪良人去溜
右鏡破金簪
折空藏蘭蕙
心不忍琴
中說

平陵老將

白羽金僕姑腰懸雙轆轤前年葱嶺北獨戰雲中
胡正馬塞垣老一身如鳥孤歸來辭第宅却占平
陵居

七言古詩

集無

乞彩牒歌

宋承爵補遺

浣花溪上如花客綠闇紅藏人不識留得溪頭瑟
瑟被淫風紙上猩猩色手把金刀裁彩雲有時翦
被秋天碧不使紅霓段段飛一時驅上丹霞壁蜀
客才多染不供卓文醉後關無力孔雀銜來向日
飛翩翩壓折黃金翼我有歌詩一千首磨礮山岳

羅星斗開卷長疑雷電驚揮毫只怕龍蛇走班班
布在時人口滿軸松花都未有人間無處買煙霞
須知得自神仙手也知價重連城璧一紙萬金猶
不惜薛濤昨夜夢中來殷勤勸向君邊覓

上春詞

以下續補

瞳矐赫日東方來禁城煙煖蒸青苔金樓美人花
屏開晨粧未罷車聲催幽蘭報暖紫芽折天花愁
艷蝶飛迴五陵年少惜花落酒濃歌極翻如哀四
時輪環終又始百年不見南山摧遊人陌上騎生
塵顏子門前吹灰

擣練篇

月華吐艷明燭燭青樓婦唱擣衣曲白袷絲光織
魚目菱花綬帶鴛鴦簇臨風縹緲疊秋雪月下丁
冬擣寒玉樓蘭欲寄在何鄉憑人與繫征鴻足

長安春

長安二月多香塵六街車馬聲麟麟家家樓上如
花人千枝萬枝紅艷新簾間笑語自相問何人占
得長安春長安春色本無主古來盡屬紅樓女如
今無柰杏園人駿馬輕車擁將去

贈峨嵋山彈琴李處士

識者咸云數百歲
有常建贈詩在

峨嶠山下能琴客似醉似狂人不測何須見我眼
偏青未見我身頭已白茫茫四海本無家一片愁

雲颺秋碧壺中醉卧日月明一作長世上長遊天地

窄晉朝叔夜舊相知蜀郡文君小來識後生常

彼何人贈我篇章苦雕刻名卿名相盡知音遇酒

遇琴無間隔如今世亂獨翛然天外鴻飛招不得

余今正泣楊朱淚八月邊城風刮地霓旌絳旆忽

相尋爲我尊前續綠綺一彈猛雨隨手來再彈白

雪連天起淒淒清清松上風咽咽幽幽瀛頭水吟

峰遶樹去不來別鶴引鷁飛又止錦鱗不動惟側

頭白馬仰聽空豎耳廣陵詩知古人不說
今人疑子期子野俱不見詩鬼哭空傷悲坐中
詞客悄無語簾外月華庭欲午爲君吟作聽琴歌
爲我留名係仙譜

南陽小將張彥瑛口租人寫射虎歌

此詩見文

苑英華失撰人名按北夢瑣言云大順景
福後... 劉... 自... 高溪虎暴尤
甚... 人... 速... 鋪... 卒... 周... 雄... 膽... 力... 異... 常... 連...
... 疑... 卽... 此... 詩... 而... 周... 雄...
... 長... 取... 賞... 之... 疑... 卽... 此... 詩... 而... 周... 雄...
... 之... 名... 或... 瑣... 言... 謂... 說... 耳... 矣... 再... 考...

海內當年狎太平橫目穰穰何睜睜天生天殺豈
天怒忍使朝朝餒猛虎關東驛路多丘荒行人最

忌稅人塲張彥雄特制殘暴見之叱起如叱羊鷓
茲霹靂越幽阻往往依林猶旅拒草際旋看委錦
齒腰間不更一作見抽白羽老饕已斃衆雛恐童稚
擗榆皆自勇忠良効順勢亦然一劍猜狂敢輕動
有文有武方爲國不是英雄伏不得試徵張彥作
將軍幾箇將軍願策勲

雜體詩 補遺

雜體聯錦

攜手重攜手夾江金線柳江上柳能長行人戀尊
酒尊酒意何深爲郎歌玉簪玉簪聲斷續鈿軸鳴

雙轂雙轂去何方
隔江春樹綠
樹綠酒旌高
淚痕沾繡袍
袍縫紫鷺濕
重持金錯刀
錯刀何燦爛
使我腸千斷
腸斷欲何言
簾動真珠繁
真珠綴秋露
秋露沾金盤
金盤湛瓊液
仙子無歸跡
無跡又無言
海煙空寂寂
寂寂古城道
馬嘶芳岸草
岸草接長堤
長堤長堤人
解攜解攜忽
已久緬邈空
回首回首隔
天河恨唱蓮
塘歌蓮塘在
何許日莫西
山雨

撫盈歌

鳳兮鸞兮
鴛綺霞疏兮
綺寮玉庭兮
春晝金屋兮
秋宵
秋暉兮
月皎笑頰兮
花嬌羅輕兮
濃麝室煖兮

香椒鑿輿去兮蕭屑七絲斷兮沈寥主父卧兮漳
水君王幸兮雲輅鉛華窈窕兮穠姿棠公盼嚮兮
靡依翠華長逝兮莫追晏相望門兮空悲

五言律詩

章臺夜思

清瑟怨遙夜遠絃風雨哀孤燈聞楚角殘月下章
臺芳草已云暮故人殊未來鄉書不可寄秋雁又
南迴

延興門外作

芳草五陵道美人金犢車綠奔穿內水紅落過牆

花馬足倦遊客鳥聲歡酒家王孫歸去晚宮樹欲
棲鴉

劉得仁墓

至公遺至藝終抱至寃沈名有詩家業身無戚里
心桂和秋露滴松帶夜風吟冥冥知春否墳蒿日
已深

梁氏水齋

獨醉任騰騰琴棋亦自能卷簾山對客開戶犬迎
僧看蟻移苔穴聞蛙落石層夜窓風雨急松外一
菴燈

曲江作

細雨曲池濱
青袍草色新
詠詩行信馬
載酒喜逢人
性爲無機率
家因守道貧
若無詩自遣
誰柰寂寥春

嘉會里閒居

豈知城闕內
有地出紅塵
草占一坊綠
樹藏千古春
馬嘶遊寺客
犬吠探花人
寂寂無鐘鼓
槐行接

紫宸

坊一作方

夏夜

傍水遷書榻
開襟納夜涼
星繁愁晝熱
露重覺荷香

香蛙吹鳴還息蛛羅滅又光正吟秋興賦桐影下
西牆

早發

早霧濃于雨田深黍稻低出門雞未唱過客馬頻
嘶樹色遙藏店泉聲暗傍蛙獨吟三十里城月尚
如珪

愁

避愁愁又至愁事事難忘夜作心中火朝爲鬢上
霜不經公子夢偏入旅人腸借問高軒客何鄉是
醉鄉

村居書事

年年耕與釣鷗鳥已相依
砌長蒼苔厚藤抽紫蔓
肥風鶯移樹嘒雨燕入樓
飛不覺春光暮遶籬紅
杏稀

雨晚眺

庚子年冬大
駕幸蜀後作

入谷路縈紆巖巔日欲晡
嶺雲寒掃蓋溪雪凍粘
鬚卧草跼如兔聽冰怯似狐
仍聞關外火昨夜徹
皇都

賊中與蕭韋二秀才同卧重疾二君尋愈余
獨加焉恍惚之中因有題

與君同卧疾，獨我漸瀰留。
弟妹不知處，兵戈殊未休。
胷中疑晉豎，耳下鬪殷牛。
縱有秦醫在，懷鄉亦淚流。

重圍中逢蕭校書

相逢俱此地，此地是何鄉。
側目不成語，撫心空自傷。
劔高無鳥度，樹暗有兵藏。
底事征西將，年年戍洛陽。

宿山家

山行侵夜到雲竇，一星燈草動蛇尋。
穴枝搖鼠上藤背，風開藥籠向月展。
漁罾明日前溪路，煙蘿更

幾層

覽蕭必先卷

滿軸編新句，翛然大雅風。
名因五字得，命合一言通。
景盡才難盡，吟終意未終。
似逢曹與謝，煙雨思何窮。

和人歲晏旅舍見寄

積雪滿前除，寒光夜皎如。
老憂新歲近，貧覺故交疎。
意合論文後，心降得句初。
莫言常鬱鬱，天道有盈虛。

對酒贈友人

多病仍多感君心自我心浮生多是夢浩歎不如
吟白雪篇篇麗清酌盞盞深亂離俱老大強醉莫
霑襟

潁陽縣

時大駕在蜀巢寇未平洛中寓居作

琴堂連少室故事卽仙蹤樹老風聲壯山高臘候
濃雪多庭有鹿縣僻寺無鐘何處留詩客茆簷倚
後峰

寄園林主人

主人常不住春物爲誰開桃豔紅將落梨花雪又
催曉鶯閒白嘒遊客暮空回尚有餘芳在猶堪載

酒來

催一作催

贈薛秀才

相辭因避世相見尚兵戈
亂後故人少別來新話
多但聞哀痛詔未覩凱旋歌
欲結巖棲伴何山好
薜蘿

和元秀才別業書事

僻居春事好水曲亂華陰
浪過河移岸雛成鳥別
林綠錢榆貫重紅障杏籬深
莫飲宜城酒愁多醉
易沈

紀村事

綠蔓映雙扉，循牆一徑微。
雨多庭果爛，稻熟渚禽肥。
釀酒迎新社，遙砧送暮暉。
數聲牛上笛，何處餉田歸。

題許仙師院

地古多喬木，遊人到且吟。
院開金鎖澁，門映綠篔簹。
深山色不離，眼鶴聲常在。
琴往來誰與，熟乳鹿徃前林。

不寐

不寐天將曉，心勞轉似灰。
蚊吟頻到耳，鼠鬪競緣臺。
戶聞知蟾落，林喧覺雨來。
馬嘶朝客過，知是禁

門開

贈武處士

一身唯一室高靜若僧家
掃地留跡影穿池浸落
霞綠蘿臨水合白道向村斜
賣藥歸來醉吟詩倚
釣查

春暮

一春春事好病酒起常遲
流水綠繁砌落花紅墮
枝樓高喧乳燕樹密關雛鵬
不學山公醉將何自
解頤

哭麻處士

却到歌吟地，閒門草色中。百年流水盡，萬事落花
空。總帳_{一作}秋，月詩樓鏤夜蟲。少微何處墮，留
恨白楊風。

和友人

圭門同隱士，不出動經時。靜閱王維畫，閒翻褚胤
棋。落泉當戶急，殘月下窓遲。却想從來意，譙周亦
自嗤。

春愁

寓思本多傷，逢春恨更長。露霑湘竹淚，華墮越梅
粧。睡怯交加夢，閒傾瀲灩觴。後庭人不到，斜月上

松篁

怯一作却

晚春

花開疑乍富
花落似初貧
萬物不如酒
四時唯愛春
峨峨秦氏髻
皎皎洛川神
風月應相笑
年年醉病身

送崔郎中往使西川行在

浙西作太

拜書辭玉帳
萬里劍關長
新馬杏花色
綠袍春草香
一身朝玉陛
幾日過銅梁
莫戀爐邊醉
仙宮待侍郎

潤州顯濟閣曉望

清曉水如鏡隔江人似鷗遠煙藏海島初日照揚
州地壯孫權氣雲燦庾信愁一篷何處客吟凭釣
魚舟

寓言

爲儒逢世亂吾道欲何之學劍已應晚歸山今又
遲故人三載別明月兩鄉悲惆悵滄江上星星鬢
有絲

哭同舍崔員外

却到同遊地三年一電光池塘春草在風燭故人
亡祭罷泉聲急齋餘磬韻長碧天應有限斜日弔

松篁

過當塗縣

客過當塗縣停車訪舊遊
謝公山有墅李白酒無樓
采石花空發烏江水自流
夕陽誰共感寒鷺立汀洲

鑷白

白髮太無情朝朝鑷又生
始因絲一縷漸至雪千莖
不避佳人笑唯慙稚子驚
新年過半百猶歎未休兵

遣興

時在婺州寄居作

如幻如泡世多愁多病身
亂來知酒聖貧去覺錢
神異國清明節空江寂寞
春聲聲林上鳥喚我北
歸秦

婺州和陸諫議將赴闕懷陽羨山居

望闕路仍遠子牟魂欲飛
道開燒藥鼎僧寄卧雲
衣故國饒芳草他山掛夕
暉東陽雖勝地王粲柰
思歸

不出院楚公

自三衢至江西作

一自禪關閉心猿日漸馴
不知城郭路稀識市朝
人履帶堦前雪衣無寺外
塵却嫌山翠好詩客往

來頻

建昌渡暝吟

月照臨官渡鄉情獨浩然
鳥棲彭蠡樹月上建昌
船市散漁翁醉樓深賈客
繼隔江何處笛吹斷綠
楊煙

歲除對玉秀才作

我惜今宵促君愁玉漏頻
豈知新歲酒猶作異鄉
身雪向寅前凍花從子後
春到明追此會俱是隔
年人

酒渴愛江清

酒渴何方療江波一掬清瀉甌如練色漱齒作泉
聲味帶他山雪光含白露精只應千古後長稱伯
倫情

南遊富陽江中作

南去又南去此行非自期一帆雲作伴千里月相
隨浪跡花應笑衰容鏡每知鄉園不可問禾黍正
離離

婺州水館重陽日作

異國逢佳節憑高獨苦吟一杯今日酒萬里故鄉
心水館紅蘭合山城紫菊深白衣雖不至鷗鳥自

相尋

避地越中作

避世移家遠天涯歲已周豈知今夜月還是去年
愁露果珠沈水風螢燭上樓傷心潘騎省華髮不
禁秋

信州谿岸夜吟作

夜倚臨谿店懷鄉獨苦吟月當山頂出星倚水湄
沉霧氣漁燈冷鐘聲谷寺深一城人悄悄琪樹宿
仙禽

齊安郡

弭棹齊安郡孤城百戰殘傍村林有瓦帶郭縣無
官暮角梅花怨清江桂影寒黍離緣底事撩起
長歎

寄江南諸弟

甲寅年自江南到京後作

萬里逢歸雁鄉書忍淚封吾身不自保爾道各何
從性拙唯多蹇家貧半爲慵祇思谿影上卧看玉
華峰

雞公嶺

去襄城縣二十里時在華州駕前奉使入蜀作

石狀雖如幘山形可類雞向風疑欲鬪帶雨似聞
啼蔓織青籠合松長翠羽低不鳴非有意爲怕客

奔齊

歲晏同左生作

以下補遺

歲莫鄉關遠
天涯手重攜
雪埋江樹短
雲壓夜城低
寶瑟湘靈怨
清砧杜魄啼
不須臨皎鏡
年長易淒淒

秋霽晚景

秋霽禁城晚
六街煙雨殘
墻頭山色健
林外鳥聲歡
翹日樓臺麗
清風劍佩寒
玉人襟袖薄
斜凭翠闌干

靈席

以下二首悼亡姬作

一閉香閨後羅衣盡施僧鼠偷筵上果蛾撲帳前
燈土蝕釵無鳳塵生鏡少菱有時還影響花葉曳
香縉

舊居

芳草又芳草故人楊子家青雲容易散白日等閒
斜皓質留殘雪香魂逐斷霞不知何處笛一夜叫
梅花

五言排律

漁塘十六韻

在朱陽縣石岸下古老
云洛水一派流出此山

洛水分餘派穿巖出石稜碧經嵐氣重清帶露華

澄瑩徹通三島巖，
嵒積萬層巢山應。
共到劉阮想，
同登壁峻苔如畫。
山昏霧似蒸，
撼松衣有雪題石。
硯生冰路熟雲中，
客名留城外僧。
饑猿尋落椽，
關鼠墮高藤。
嶮樹臨溪亞，
殘莎帶岸崩。
持竿聊藉草，
待月好垂簷。
對景思任父，
開圖想不興。
晚風輕浪疊，
暮雨濕煙凝。
似泛靈查出，
如迎羽客昇。
仙源終不測，
勝槩自相仍。
欲別誠堪戀，
長歸又未能。
他時操史筆，
爲爾著良稱。

和薛先輩見寄初秋寓懷卽事之作二十韻
玉律初移候，清風乍遠襟。
一聲蟬到耳，千炬火燃

心嶽靜雲堆翠樓高日半沈引愁憎暮角徵鷓鴣怯
殘碓露白凝湘簟風篁韻蜀琴鳥喧從果爛塔淨
任苔侵柿葉添紅影槐柯減綠陰揉珠逢寶窟闕
石見瑤林魯殿鏗寒玉台山激碎金卸堂流桂影
陳巷集車音名自張華顯詞因葛亮吟水深龍易
失天遠鶴難尋鑒貌寧慙樂論才豈謝任義心孤
劍直學海怒濤深既觀文兼質翻疑古在今慙聞
紆綠綬卽候挂朝簪晚樹連秋塢斜陽暎暮岑夜
蟲方唧唧疲馬正駸駸托跡同吳燕依仁似越禽
會隨仙羽化香蟻且同斟

同舊韻

大火收殘暑清光漸惹襟謝莊千里思張翰五湖
心暮角迎風急孤鐘向暝沉露滋三徑草日動四
鄰碓簾委班姬扇蟬悲暮環琴方憇丹桂遠已怯
一毛侵甃石迴泉脉移棋就竹陰觸藤絲體網避
隼鳥投林貌愧潘郎壁文璧呂相金但埋鄧獄氣
未發囊桐音靜笑劉琨舞閒思阮籍吟野花和雨
斷惟石入雲尋跡競終非幻幽閒且自任趨時慙
藝薄託質負一作仰恩深美價方稀古清名已絕今
既聞留縞帶詎肯擲著簪遲客虛高閣迎僧出亂

岑壯心徒戚戚逸足自駸駸安羨倉中鼠危同幕
上禽期君調鼎鼎他日俟羊斟

三用韻

素律初迴馭商飈暗觸襟乍傷詩客思還動旅人
心蟬噪因風斷鱗遊見鷺沉笛聲隨晚吹松韻激
遙磯地覆青袍草窓橫綠綺琴煙霄難自致歲月
易相侵澗柳橫孤釣巖藤架密陰瀟湘期釣侶郭
杜別家林遺愧虞卿壁言依季布金錚鏃聞郢唱
次第發巴音螢影衝簾落蟲聲擁砌吟樓高思共
釣寺遠想同尋入夜愁難遣逢秋恨莫任蠓遊苔

徑滑鶴步翠塘深莫問榮兼辱寧論古與今固窮
憐筮脯感舊惜蒿簪晚日舒霞綺遙天倚黛岑鴛
鸞方翩翩驥驥整駸駸未化投陂竹空思出谷禽
感多聊自遣桑落且閒斟

李氏小池亭十二韻

時在婺州
寄居作

積石亂巉巉庭莎綠不芟小橋低跨水危檻半依
巖花落魚爭啜櫻紅鳥競鷗

竹咸切鳥
啄物也

引泉疏地

瓜掃絮積山欹古柳紅綃織新篔紫綺緘養猿秋
嘯月放鶴夜棲杉枕簟谿雲膩池塘海雨鹹語空
鷄逞辯砥鼎大偏饒踏蘚青粘屐攀蘿綠映衫

僧舟北渡貫酒日西銜
遲客登高閣題詩遶翠岳
家藏何所寶清韻滿琅函

和鄭拾遺秋日感事一百韻

禍亂天心厭流離客思傷
有家拋上國無罪謫遐
方負笈將辭越揚帆欲泛湘
避時難駐足感事易
回腸雅道何銷德妖星忽耀芒
中原初縱燎下國
竟探湯盜據三秦地兵纏八水鄉
戰塵輕犯闕羽
旆遠巡梁自此修文代俄成講武場
熊羆驅豕鹿
犀象走昆陽御馬逃新棧宮娥改舊粧
五丁功再
覩八難事難忘鳳引金根疾兵環玉弩彊
建牙雖

可恃摩壘詎能防霍廟神遐遠圮橋路杳茫出師
威似虎禦敵狠如羊眉畫猶思赤巾裁未厭黃晨
趨鳴鐵騎夜舞挹瓊觴僭侈彤襜亂誼呼繡鬚攘
但聞爭曳組詎見學垂韁鵠印提新篆龍泉奪曉
霜軍威徒逗撓我武自惟揚負宸勞天眷凝旒念
國章繡旗張畫獸寶馬躍紅鴛但欲除妖氣寧思
蔽耿光曉煙生帝里夜火入春坊鳥怪巢宮樹狐
驕上苑牆設危終在德視履豈無祥氣激雷霆怒
神驅岳瀆作功高分虎節位下耻龍驤遍命登壇
將八封異姓王志求扶墜典力未振頽綱漢路聞

鵬鷲雲衢駐驕驕寶裝軍
崑麗麝衰戰袍香日觀
兵書捷時聞虜騎亡人心
驚獬豸雀意伺螳螂上
略咸推妙前鋒鉅可當紆
金光照耀執玉意藏昂
覆餗非無謂奢華事每詳
四民皆組綬九土墮耕
桑飛騎黃金勒香車翠鈿
裝八珍羅膳府五采關
筐牀宴集喧華第歌鍾簇
畫櫺永期傅子姓寧誤
犯天狼未覩君除側徒思
玉在傍竄身奚可保易
地喜相將國運方夷險天
心詎測量九旒雖暫蔽
二柄豈相妨小孽乖躔次
中興繫昊天卷法堯功已
晉罪已德非涼帝念惟思
理臣心豈自違詔催清

瑣客時待紫微郎定難輸宸笑勝灾滅御梁皇恩
思蕩蕩睿澤轉洋洋偃卧雖非晚艱難亦脩嘗舜
庭招諫鼓漢殿上書囊儉德遵三尺清朝俟一匡
世隨漁父醉身效接輿狂竄逐同天寶遭罹異建
康道孤悲海澨家遠隔天潢卒歲貧無褐經秋病
延漳似魚耳去乙比蟹未成筐守道慙無補趨時
愧不臧殷牛常在耳晉豎欲潛育忸恨山思板懷
歸海欲航角吹魂悄悄笛引淚浪浪亂覺乾坤窄
貧知日月長勢將隨鶴列忽喜遇鴛行已報新迴
駕仍聞近納隍文風銷劍楯禮物換旂裳紫闥重

開序青衿再設庠黑頭期命爵頰尾尚憂魴吳坂
嘶騏驥岐山集鳳凰詞源波浩浩諫署玉鏘鏘飼
雀曾傳慶烹蛇詎有殃發弓揮勁鏃匣劍淬神鋒
諤諤寧慙直堂堂不謝張曉風趨建禮夜月直文
昌去國時雖久安邦志不常良金鑪自躍美玉櫝
難藏北望心如旆西歸律變商跡隨江燕去心逐
塞鴻翔晚翠籠桑塢斜暉掛竹堂路愁千里月田
愛萬斯箱伴釣歌前浦隨樵上遠崗鷺眠依晚嶼
鳥浴上枯楊驚夢綠欹枕多吟爲倚廊訪僧紅葉
寺題句白雲房帆外青楓老樽前紫菊芳夜燈銀

耿耿曉露玉瀼瀼異國慙傾蓋歸塗俟併糧身雖
留震澤心已過雷塘執友知誰在家山各已荒海
邊登桂檝煙外泛雲橋巢樹禽思越嘶風馬戀羌
寒聲愁聽杵空館厭聞蜚望闕飛華蓋趨朝振玉
璫米慙無蕙苴麩喜有桄榔話別心重結傷時淚
一滂佇歸蓬島後綸詔潤青絳

和李秀才郊墅早春吟興十韻

自三衢至
江西作

暖律變寒光東君景漸長我悲遊海嶠君說住柴
桑雪色隨高嶽水聲陷古塘草根微吐翠梅朶半
含霜酒市多逋客漁家足夜航匡廬雲傍屋彭蠡

浪衝牀綠擺楊枝嫩紅挑菜甲香鳳凰城已盡鸚
鵡賦應狂竹見龍辭沼寧憂雁失行不應雙劍氣
長在斗牛傍